

肇慶府志卷六

建置三 學校

肇慶府

府學在城東一里舊在舊縣治東七十步宋崇寧遷今所紹興間郡守李麟鄭啟沃增創元季修輯後毀於兵明洪武二年知府李從信鼎建宣德間知府王瑩撤而新之天順初西賊流劫兩據學宮知府黃瑜奏遷於城中東倉地今三司署是其故地成化間知府李璲改學門贅泮橋宏治間知府黃琥重修通判李敏立射圃正德元年知府黃容修大成殿及厨庫十二年通判呂泮修明倫堂及書樓嘉靖六年總制兩廣新建伯王守仁飾堂齋之不稱者十年始奉制易大成殿曰先師廟建啟聖祠又建敬一亭十一年巡按御史吳麟知府錢鐸復

遷今所市民地以廣之殿廡堂舍具備嘉靖十二年都御史
吳桂芳乃於廟後建尊經閣隆慶三年同知郭文通於廟之
左建明倫堂萬厯九年知府王泮買民居開學門臨大江護
以石欄接東西街樹坊四

一崧山起鳳一端水騰蛟一崇儒一貞教

又於甲位建

文峯塔萬厯十四年圯於洪水知府鄭一麟重修左學右廟
廟前兩廡爲戟門列神厨神庫泮池橋在戟門外爲櫺星門
南樹翼宮坊十九年總制劉繼文捐贖鍰六百餘兩并知府
王泮黃時雨前後捐助建尊經閣二十九年知府陳濂重修
明倫堂齋舍闢青雲路三十一年復買民地闢圍牆遷起鳳
騰蛟二坊於街外石欄頽泐督撫周嘉謨鳩工重修廟左爲
明倫堂爲四齋東曰居仁曰立禮西曰由義曰廣智前儀門
列號房又前爲儒學門堂後爲講堂卽教授署東西爲訓導

署甲寅年改建尊經閣於明倫堂後而以廟後舊址爲啟聖

祠東名宦西鄉賢敬一堂在後山頂

中立敬一箴東西立五歲

甃以石周

以牆督府張鳴岡知府戴禧建知府陳謨修崇正五年知府

陸鏊與通判史延旭重修明末毀於兵

國朝順治十五年

知府楊萬春倡率紳士修復明倫堂尊經閣啟聖祠仍附鄉

賢名宦祠於左右次年重建大魁樓康熙六年推官吳百朋

教授姚士裘重修聖殿兩廡以及文昌宮土地祠戟門泮池

八年颶風大作聖殿大魁樓尊經閣櫺星門俱被飄毀十一

年總督兩廣部堂金光祖廣肇南韶道任垓知府史樹駿同

知韓世林通判董啟捐修四十八年知府王經方重建牌樓

吳志五十七年知府宋志益捐建學署

郝通志

道光二年知府屠

英捐俸修葺六年署高要縣葉承基修前門照牆十二年知

府珠爾杭阿重加拆建

明張元貞修肇慶府儒學記肇慶府儒學初在府治東宋舍
法行隘其地更徙城東一里許富民坊我朝因之天順間爲
西獠殘毀化成化乙酉前守桂林黃公瑜以聞遂內遷今處時
尙急遽規制多未備者於茲垂三十年凡百就弊丁未秋今
守豐城黃公琥至甫謁視卽愀然不寧曰茲朝廷教化之原
郡守責也茲弗治餘可知已顧肄業之舍會食之堂尤所不
可緩則首刱之凡三十四間次殿廡次櫺星門次御書樓次
明倫堂次齋次禮樂器次庖湑缺靡不補壞靡不修外而周
垣亦悉易以磚石舉之維時爲之有漸不棘以疾不久以隳
至今宏治甲寅秋工始訖訖廟亭規制於是煥然一新視前
益偉而備矣公以教化之所關於諸士子宜申以教化之義
特走書幣以屬貞記貞惟教有本化有源古昔盛時天子公
卿悉身之於上而下之被教化者亦然蓋惟講明其所當然
與其所以然而責其身以必然非講讀誦說文字而已也夫
彝倫性分之理叅贊經綸之術諸士子稽之典籍著之文辭
有素矣盍反而責之身心乎哉道不離日用間夫人能言之
而身之者鮮必內之無少愧外之無或愆則教化之本源以
立異時進用上之翊天子教化於天下次之翊天子教化於
一國於一郡邑吾儒成已成物全體大用之學實如此然而
壯行功少幼學功多達施功易窮養功難諸士子在學校當
如在廟堂今日之書生來日之美意貞承屬筆敬以是復
教育之盛心賢師帥作新之

陳萬言重修肇慶府儒學記高皇帝建學二百餘禩菁莪棫
樸之澤涵濡惟沃雖炎荒僻壤庠序絃誦之聲日馳焉齒中
州矣學校之政惟憲臣一人督之賜之璽書責任誠重然統
蒞廣而周浹難故一切倚辦於良二千石二千石所理民事
其能存心教化者鮮若今兵憲王公昔之守端真可謂良二
千石存心教化者乎公以萬厯八年由尚書郎出守端據
東粵上游其形勢則山自桂連蜿蜒而南而石室扼其勝水
自邕桂合而東而羚羊峽束其流枕山帶河蓋粵之奧區也
石室之前府城之東爲儒學中爲先師廟爲儀門爲櫺星門
其左爲肇慶府學右爲高要縣學俱南面江巒門外民居偪
翳公撫然曰宮牆所以羣青衿列俎豆湫隘弗稱毋惑乎風
氣之堙鬱俊民之弗章也爰出俸金售民地拓而廣之自巖
門至屏衛若干丈護以欄楯外建綽楔二東曰崧山起鳳西
曰端水騰蛟屏外爲通衢下瞰大江釐其階礧極爲崇麗復
於左方建浮屠高數十仞狀若文筆開渠數千百丈通江流
跨虹橋以束地脉見公所自爲記今太守鄭君一麟又於江
南建浮屠一高廣如之文人學士登覽於此俯眺學宮翬飛
於前星巖雄峙清渠縈帶長江如練兩涯諸峯若拱若揖眞
天下奇觀也是舉也財不廢公力不病民間有捐金助役者
聽王公始之府倅董君石曾君孔志朱君士貴唐君民敏襄
之董其役者則典史楊文潮經始於萬厯九年八月落成於
十三年六月於是學博寶君時春薛君邦政徵記於萬言曰
史記文翁治蜀教化一事耳王公守端豐功偉績未可殫述
而其最者在文教旣陳臬事猶爲故郡畫策成學校所未備

之典不但講戈鋌鞠師旅張皇六師則其重可知也諸生睹騰蛟起鳳孰無翱翔寥廓之思乎翔於千仞之上覽德輝而下之乘風雲而雨天下斯無負祖宗建學與良有司作人至意若徒甘豢養而稻粱之謀其德衰矣何以稱神哉諸生勉之萬歷十三年季夏

楊起元重修肇慶府儒學記肇慶爲郡山雄水遠蓋自夜郎下牂牁始出番禺而肇慶縮轂其口其鍾天下之氣脉爲豐郡大司馬以節鉞鎮撫東西粵則開府於是東西粵文武百吏歲時奔走請事不絕及兩地縉紳先生與其賢人才士大司馬所賓禮者亦時至焉名雖爲郡實一大都會也土緣是彬彬質有其文稱海濱鄒魯矣而郡學與邑學同廟異堂實據勝區郡守山陰鄭公嘉進多士修舉子業於其間躬勸課焉今歲之夏西潦泛溢學宮之被於水者浹旬垣傾宇頽博士無所止而諸生失其所依乃其貧者尤苦不給至於閭閻細民蕩析無聊咸籲乎公之前公爲白大司馬吳公兵憲王公次第賑恤之而得出公帑并捐俸爲修學宮費殿堂門廡齋舍庖庫鄉賢名宦煥然一新陶垣登壁令不復水以萬歷十四年臘月經始明年二月落成蓋僅六十餘日而博士有所止諸生有所依公勸課猶故若未嘗被於水者嗟夫汝端人士幸厚矣蓋公所爲汲汲於學之修者匪學宮之急以汝端人士曠學是懼公視汝端人士卽已之子若弟然也工成於六十日人以爲速公謂吾子弟亦廢學六旬矣人之所速公所遲也而汝端人士亦有體公之心而惕然以廢學自懼者乎誠懼焉則分寸之陰必惜而肯貿貿以虛吾此生乎

凡學以學爲聖人也學爲聖人者以學爲人也由聖人之言以求聖人之心由舉業之文以求聖人之言故舉業者學聖人之梯筏也而豈以爲青紫之媒哉故得聖人之真心然後能識聖人之真言然後能爲真舉業後儒淺俗失其要領其浸淫吾學也奚啻滔天之水哉夫學宮之敝也可以六旬而修學術之敝也未易以千百年而復學者誠知吾本然之真心則頃刻之間立登道岸尙無假于六旬而敢云千百年不可復哉昔孟子之時楊墨充塞獨恃性善之說爭當世之惑而其功與神禹比隆故其自任亦曰禹抑洪水我亦欲正人心我祖宗列聖統一聖真人心無弗正所願多士自正其心自抑洪水以無負於國家菁莪之化如是而已公名一麟爲余同年進士襄其成者郡丞方君應時郡倅朱君士貴劉君獻義司理傅君國才高要縣令蕭君九章董役則照磨吳中相也旣訖工諸生不敢忘所有圖所以紀歲月庠師李君茂魁會其僚區君鐸介予文爲之記時萬厯丁亥仲春

珠爾杭阿重修肇慶府學宮記肇慶府學宮距城東里許遷建於宋崇寧初元末遭兵燬明洪武初建復天順初流賊再燬之仍遷建城中嘉靖十年重遷今所明末又燬國朝順治十五年修復迨康熙十一年總督金公率屬大修後迄今百數十年矣間有補葺而厯時旣久風雨剝蝕日就傾頽且前臨大江兩廡階墀輒因盛漲淹沒其何以肅觀瞻而光俎豆郡人士爰有重修之請前觀察仁和許公捐廉爲倡長白松公亦相繼捐資余則先後兩分薄俸而前權郡事

吳江金君與諸寅僚咸欣然樂襄盛舉至郡屬搢紳士庶無不踴躍簽題於是鳩匠經營庀材修造以舉人梁振鼇等董其事凡殿宇門廡垣墉唐涂概行拆建增高基址以防西潦階陛盡易文石梁柱半更荆木尊經閣舊蹟久湮因鼎建於明倫堂上大成門外東偏添設小廳二其兩旁逼近市廛向多侵占踐踏之虞茲特勒石永行示禁是役也經始於道光九年十二月落成於十二年十二月事雖因而功實創固由當道之倡率而深賴郡人士之勇於捐輸並司其事者之規畫盡善不遺餘力以相與有成今日者廟貌一新規模式煥星巖峙其北端水環其南嵐翠霏微波光潏灩山川靈淑之氣與泮池芹藻之芬交相蘊結而會萃於是以前年來科第蟬聯人文鵲起大有蒸蒸日上之勢此後郡人士勉修文行砥礪濯磨讀聖賢書志聖賢志修於家而獻於

廷行將卓然蔚然爲嶺南諸郡冠於以仰副聖天子棫樸作人之雅化豈不休哉若夫物之成毀有時其所以經久而不廢者踵事增修又有望於後之守此土者矣因郡人士來乞余言並呈聖廟輯畧及重修經費二卷旣詳且盡茲不復贅惟記其大畧云爾道光十二年十二月吉旦

學額

府學三十名

內開平縣客童二名

廩生四十名增生四十名一年一貢

嘉慶十二年議准開平縣客童照新寧縣例酌設進額文童一名武童一名撥入府學毋庸另設廩增額缺亦不必別定出貢年分

阮通志

武生額照文童

吳志

學田

原額學田塘共一頃八十二畝零三釐一毫鋪一十四間租

銀四兩二錢地一段租銀一兩五錢共銀七十八兩零七分

五釐內除原報荒地一段缺銀一兩五錢行據該府學結報此地又奉院道建

立教場阮通志

實在田塘共稅一頃八十二畝零三釐一毫通計每畝徵租

銀三錢九分七釐五毫九絲七忽該銀七十二兩三錢七分

五釐又鋪一十四間租銀四兩二錢共租銀七十六兩五錢

七分五釐

同上

蛇頭圍稅二頃一十一畝九分二釐六毫三絲每年租穀二百二十石零九斗二升內除文廟香燈穀三十石尙

實租穀一百九十石零九斗二升除納糧米外餘羨銀兩
解府存貯以備修葺閭江樓之用
高要縣沙田仔湖塘等處租穀十一石詳見高要學田
學田鋪地一十八間每年地租共銀六兩零六分四釐解
府轉解學院發給各貧生
四會縣白鶴塘孔肇高戶每年由四會縣移解塘租銀三
兩四錢六分五釐到學湊同解府轉解學院發給各貧生
俱吳志

按學田租額阮通志與吳志互異茲以通志為主吳
志附注於後吳志缺載則采縣志以備叅稽

高要縣

縣學舊在縣治東七十餘步府學遺址宋政和甲午郡守毛
衍卽其地以爲縣學歷代興廢莫考明洪武初創建廟東學
西十年知縣胡本道增修置射圃永樂十年知縣常庸徙堂
齋於殿後以舊堂齋爲學倉解宇宣德七年知府王瑩重修
正統間提學僉事彭琉偕知府王瑩復學後侵地築書樓新

大成殿鑿泮池亭射圃增築號舍又復學前侵地爲解宇景

泰七年同知饒秉鑑奏以官倉空地易軍營軍營在書樓後撤書樓

爲兩齋天順七年知府王瑜知縣朱茂建儀門及齋南號舍

成化三年知縣劉欽重建明倫堂櫺星門七年知縣孫珍重

建戟門解宇宏治間知縣左濬改儀門於大成殿左正德二

年知縣錢世用重修十二年知縣秦行健建杏壇於書樓北

嘉靖十一年巡按御史吳麟知府錢鐸建議遷學於今府學

廟右與府學合廟萬厯九年知府王泮買民居闢學門二十

年督府蕭彥乃令復遷於城內原學舊址府治之東衛署之

西督府陳堯後先繼之三十一一年知府陳濂填後塘建尊經

閣四十四年通判許學賢推官李春熙改學前路天啟二年

知縣汪漸磐重修廟廡先是廟後地陷堂齋傾圯教官僦居

民舍知府陸整知縣張明熙先後葺修先師廟兩廡戟門左
爲鄉賢祠右爲土地祠中爲泮池橋右爲名宦祠前爲櫺星
門照牆曰宮牆萬仞左旁爲雲路坊進爲儒學門直循而上
爲巽門八明倫堂又直循而上爲尊經閣閣在明倫堂後卽
啟聖祠教諭舍在堂屏內訓導舍在堂東西 國朝厯經修
葺乾隆元年紳士梁鳳來等請將乾隆二三年優免丁銀七
百餘兩開復宮前青雲路經縣令顧葵詳允不敷工料銀兩
除顧令捐俸四十金外餘出紳衿公捐并修尊經閣十六年
知縣王士瀚倡修學宮二十年知府吳繩年捐貲將青雲路
石坊遷八八丈餘添建牌樓一座照牆一幅併於東城上建
文昌閣吳志道光五年署縣葉承基重修縣志十二年署知縣曾
名芹又修

學額

縣學十五名廩生二十名增生二十名二年一貢阮通志武生

額照文童 軍屯所學文武各二名雍正十三年奉例撥八府學 吳志

學田

原額學田塘共二頃一十八畝七分零三毫地一段租銀四

錢鋪一十間租銀四兩三錢共銀五十一兩四錢零一釐內

除原報荒田一頃一十三畝二分六釐一毫又地一段起造

馬房缺銀四錢鋪一十間拆建馬房缺銀四兩三錢共缺銀

一十八兩三錢二分六釐現行招墾另報 阮通志

實在田塘共稅一頃零五畝四分四釐二毫通計每畝徵租

銀三錢一分三釐六毫七絲九忽共實徵租銀三十三兩零

七分五釐同上

原學田每年租穀八十石除變價解學租銀三十三兩零七分五釐完納錢糧銀一兩色米三斗餘為挑運及諸生

月課卷麵之費

又乾隆二十三年高要縣張慶長詳定前學院王安國置

買鍾玉炳田稅四畝七分二釐三毫一絲坐在西廂一圖

上五甲鍾會林戶內土名沙田仔黃井小坑等處每年租

穀一十四石又買鄒兆鈞稅一十三畝二分六釐五毫一

絲坐在祿步都一圖二甲鄒孟勝戶內土名湖塘青岡坑

仔等處每年納穀三十五石內支府學宮芟草穀九石

看魁星樓穀二石縣學宮芟草穀八石餘為挑運納糧

燈油打俱吳

掃之費志

書院

端溪書院在高要縣學宮西故鼓鑄局址舊在縣署東明僉

事李材建後為嶺西道署又改督標中軍副將署今移建之

萬壽宮是其故址康熙四十七年總督趙宏燦改建天章書

院於今所郝通志前為講堂堂上為天章閣又名挾天閣中為

宣教堂一座五間堂後偏東為蓮池池後為近光亭東西翼

以齋舍雍正十年總督郝玉麟修吳志乾隆二十二年知府吳

繩年於近光亭後捐買民房地添建後樓九間奉祀先賢併

移建亭池於中及修葺兩廊齋舍採訪冊嘉慶五年總督吉慶

題請修葺阮通志先是院門在閣前東向二十年總督蔣攸銛

就舊

萬壽宮址改闢門南向拓前垣門內添建齋舍縣志二十三年

總督阮元題修阮通志道光三年揆天閣西角傾圯壓倒廊房

數間宣教堂近光亭將次朽壞今糧道夏修恕攝府事捐俸

遍加修葺縣志十二年知府珠爾杭阿捐廉重修

按書院何時復端溪之名諸志闕載高要新志以爲

意卽雍正十年所改但考是年制府郝玉麟碑記仍

題天章書院乾隆十七年全祖望帖經小課題辭署

銜亦云天章山長至乾隆二十二年山長何夢瑤記
始稱端溪書院二十四年修府志遂直標端溪書院
不復有天章之目然則復端溪之名殆在二十二年

重修時歟

國朝郝玉麟天章書院記天章書院者粵東端州就圯之書
院余葺而新之聞之

天子而以教育粵東人士之秀者也夫五嶺之表珍奇所宅
前志言之蓋詳而今日之人民則自古未有我國家重熙
累洽聲教覃敷瀕海之民無桴鼓之警而有絃誦之樂所以
涵濡長養陶冶而成之者既非一朝一夕之故矣而又歲屏
珠池之貢市羅蕃物之饒官無薏苡之疑吏識貪泉之戒四
民樂業衣食滋豐而禮讓興焉固知百粵人文之盛度越前
代者其來有自余以雍正七年奉
命建節茲土

君恩高厚夙夜戰兢期有以宣

聖澤之汪洋佐文治於萬一下車之初庶務粗理爰觀民風
先此髦士合十府一州而校之得卷三萬有奇愼其選拔其
尤異其等第其賞夫豈以循故事飾聲譽乎直欲卽土觀民
因文卜行而爲此汲汲也旣復自思念以爲人才之生猶木
也育才之道猶作室也苟非擁腫而不中繩墨拳曲而不中